



Komunikadu Imprensa

Japaun Fó Aproximadamente USD Millaun 20 ba

Hadi'a Ospital Nasionál Guido Valadares

Dili, 21 Agostu 2024 – Hala'o ona serimónia asinatura rua ba Projetu Hadi'a Ospital Nasionál Guido Valadares ne'ebé finansia husi Governu Japaun. Iha loron 14 fulan Agostu, Troka Nota (E/N) ba projetu ne'e asina husi Sr. KOMURA Masahiro, Vice-Ministru Parlamentár ba Asuntu Negósius Estranjeirus Japaun nian, no S.E. Dr. Bendito dos Santos Freitas, Ministru Negósius Estranjeirus no Kooperasaun. Iha loron 21 Agostu, Akordu Subvensaun (G/A) ba projetu ne'e mós asina ona husi Dr. ITO Mimpei, Representante Xefe Ajénsia Kooperasaun Internasionál Japaun (JICA) Gabinete Timor-Leste, no S.E. Sra. Santana José Rodrigues F. Viegas Cardoso, Ministra Finanzas, iha prezensa Sr. KIMURA Tetsuya, Embaixadór Japaun iha Timor-Leste no S.E. Dra. Élia A. A. dos Reis Amaral, Ministra Saúde.

Projetu ida-ne'e, ho subsídiu 3.93 billoens Yen Japonés (maizumenus millaun 20 USD) hosi Japaun, hakarak hadi'a nível servisu médiku sira iha Ospital Nasionál Guido Valadares, úniku instalasaun kuidadu tersiáriu iha nasaun, liuhosi hadi'a instalasaun médiku sira inklui sirúrjiku no departamentu perinatal no fornese ekipamentu médiku ne'ebé relasionadu, nune'e kontribui ba espansaun servisu sosiál sira liuhosi hadi'a sistema kuidadu saúde nasaun nian.

Durante serimónia asinatura E/N ne'e, Vice Ministru Parlamentár KOMURA afirma *katak* “Japaun fó ona apoiu ba Timor-Leste dezde Enkontru Parseiru Dezenvolvimentu dahuluk ne'ebé hala'o iha Tóquio iha tinan 1999. Ami-nia nasaun nia apoiu aliña ho política Timor-Leste nian ne'ebé tau prioridade ba saúde nu'udar ninia área xave sira. Ha'u hein katak ema barak liután sei hetan asesu ba servisu médiku sira ho kualidade, ne'ebé sei tulun nasaun nia adezaun formál ba ASEAN.”

Embaixadór Kimura mós haktuir iha nia diskursu durante serimónia asinatura G/A ne'e katak, “Ha'u kontente atu konfirma katak Japaun fó importánsia boot ba apoiu setór saúde Timor-Leste nian. Antes ne'e Japaun fó ona apoiu ba Ospital Nasionál Guido Valadares”. no “Ami mós envolve iha projetu oioin inklui establesimentu postu saúde no sentru apoiu ba kankru, forneseimentu ambulánsia Japaun nian, formasaun médiku, ho kolaborasaun ho ONG Japaun no lokál sira. Ha'u hein ho laran tomak katak projetu hirak ne'e, inklui projetu foun ne'ebé ohin asina ona akordu subvensaun ne'e, sei kontribui ba povu Timor-Leste nia moris di'ak.”

Tinan ida ne'e marka aniversáriu ba dala-25 kooperasaun entre Japaun no Timor-Leste, ne'ebé hahú ho Enkontru Parseiru Dezenvolvimentu dahuluk ne'ebé organiza iha Tóquio iha tinan 1999.

###REMATA###

Ba informasaun klean liu tan bele kontaktu:

Embaixada Japaun iha Timor-Leste iha +670 3323131 | 2

Ajénsia Koperasaun Internasionál Japaun (JICA) Timor-Leste iha +670 7317 3486 | 3312420